

Matumuuna Inatsisartut suleriaasianni § 33 malillugu aalajangiiffigisassatut siunnersuut imaattoq Naalakkersuisut saqqummiuppaat:

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnerat pillugit inatsisip (Malersuineq akiorniarlugu suliniutit patajaallisaavigineqarnerat, kinaassutsimik atonerluinerup pinerluutinningortinneqarnera aamma unnerluussuteqarnissamut piffissaliussap unitsinneqarnera il.il.) pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuutip aamma Qanilleqqusinnginneq, najugaqataasinnaannginneq aamma anisitsisarneq pillugit inatsisip allanngortinneqarnera pillugu inatsisit assigiinngitsut Kalaallit Nunaannut atuutilersinneqarnissaat pillugu peqqussutissamut missingiut**

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

### **Tunngavilersuut**

Kalaallit Nunaanni qallunaat akisussaaffigalugit suliassaqarfiisa ineriartortinneqarnissaannut naalakkersuisut Kalaallit Nunaannilu Namminersorlutik Oqartussat suliaqarnerannut atatillugu inatsisissatut siunnersuut suliarineqarpoq. Tassunga atatillugu pinerluttulerinermi inatsimmi malersuineq pillugu immikkut ittumik aalajangersakkamik ilanngussisoqarnissaannik kissaateqarnertik Naalakkersuisut ilaatigut saqqummiussimavaat.

Malersuineq akiorniarlugu suliniutit patajaallisaavigineqarnissaat, kinaassutsimik atonerluinerup pinerluutinningortinneqarnissaa aamma unnerluussuteqarnissamut piffissaliussap unitsinneqarnera pillugu malittarisassat piuminarnerulersinneqarnissaat, inatsisissatut siunnersuutip siunertaraa. Inunnut, pinerluttulerinermi inatsisip aamma eqqartuussisarnermik inatsisip malitsigisaanik napparsimavimmi paaqqinniffimmiluunniit inissinneqarsimasunut anisinnaatitaaneq il.il. pillugit malittarisassanik aalajangersaasinnaanissamut piginnaatitsinerit pisariaqartinneqartut pilersinneqarnissaat inatsisissatut siunnersuutip aammattaaq siunertaraa.

Pinerluttulerinermi inatsimmi malersuineq pillugu immikkut ittumik aalajangersakkamik ilanngussisoqarnissaa siullertut aallarnerniarneqarpoq, taassumalu, naak siulingaani qanilleqqusinnginneq, najugaqataasinnaannginneq imaluunniit anisitsisarneq naalakkiutigineqarsimannikkaluartoq, iliuseqartup malersuisutut eqqartuunneqarsinnaanissaa qulakkiissavaa.

Tamatuma peqatigisaanik malersuineq pillugu suliani eqqunngitsuliorfigineqartut eqqartuussisarnermik inatsimmi § 333 malillugu illersuisumik, soorlu assersuutigalugu nakuuserneq pillugu suliani pisartut peqatigisaannik, ivertitsivigineqarnissaat aallarnerniarneqarpoq.

Taamatutaaq malersuineramik suliani iliuseqartup iperagaanerani anineranilu noqqaassuteqarneq malillugu eqqunngitsuliorfigineqartup kalerrinneqarnissamik pisinnaatitaassaaq, aamma pasineqartoq aamma meeqqap qaniginerpaasarippagu, meeraq imaluunniit meeqqap qaniginerpaasaa eqqunngitsuliorfigineqarsimappat, meeqqat 15-it inorlugit ukiullit video atorlugu killisiorneqartarnissaannut periarfissinneqarpoq.

Tamatuma saniatigut pinerluttulerinermi inatsimmi eqqissisimanermik akornusiinerit nikanarsaanerillu pillugit kapitalimi aalajangersakkamik nutaamik ilanngussisoqarnissaa aallarnerniarneqarpoq, taassumalu inuup pisinnaatitaanani paasissutissanik, matumani cpr-normumik, atermik aamma assimik atuinera, ileqqorissaarneq malinnagu allaasusaarnera imaluunniit atortussanik pisinnaatitaanani ingerlatitseqqinnera, tassani paasissutissat taamaattut ileqqorissaarneq malinnagu inuup allap tamanut saqqumineranik uukapaatitsiniutiginninnera, pinerluutinngortissavaa. Kinaassutsimik atonerluineranut inerteqquteqarneq nalinginnaasumik atuutissasoq siunnersuutigineqarpoq, imaappoq atonerluineq internettip iluani avataani pitillugu atuutissalluni.

Kapitalimi tassani pinerluttulerinermi inatsimmi oqaaseqaatit, nalunaarutit imaluunniit assit, inatsimmi §§ 94-imik aamma 99-imik (eqqissisimanermik akornusiinerit nikanarsaanerillu) unioqquitsinernut attuumassuteqartut kiisalu oqaaseqaatit taakku il.il. tikinneqarsinnaanerisa ingerlateqqinneqarsinnaanerisalu akornuserneqarnissaat siunertaralugu § 95 a-tut aalajangersagassatut siunnersuutigineqartumut attuumassuteqartut, nunguterneqartarnerat pillugit § 99 a-mi nutaamik aalajangersakkamik ilanngussisoqarnissaa siunnersuutigineqarpoq.

Pinerluttulerinermi inatsimmi unnerluussuteqarnissamat piffissaliussat unitsinneqartarnerat pillugu Naalakkersuisut noqqaassuteqarnerisigut aalajangersakkap allanngortinneqarnissaa siunnersuutigineqarpoq, taamaalluni pinerluttulerinermi inatsimmi § 21, imm. 5-imi aalajangersagaq malillugu ullumikkut oqartussaasut allat assigalugit unnerluussisussaataasut politiillu piffissaliussap unitsinneqarnissaanut piuminartumik suleriaaseqalissammata. Assersuutigalugu Danmarkimisut aalisarneq pillugu inatsisiliornerni unioqquitsinernut akiliisitsissutit pillugit suliani pisoqalisootitsisarnerup unitsinneqarnissaa pillugu malittarisassat assingisa eqqunneqarnissaat, tamatuma kinguneraa.

Naggataagut pinerluttulerinermi inatsimmi aamma eqqartuussisarnermik inatsimmi inunnut, pinerluttulerinermi inatsisip aamma eqqartuussisarnermik inatsisip malitsigisaanik eqqartuussivimmi aalajangiinerit malillugit napparsimavimmi imaluunniit paaqqinniffimmi inissinneqarsimasunut anisinnaatitaaneq il.il. pillugit malittarisassat allaffissornikkut aalajangersaavigineqarsinnaanerannut pinerluttulerinermi inatsimmi aamma eqqartuussisarnermik inatsimmi piginnaatitsinerit pisariaqartinneqarneqartut eqqunneqarnissaat aallarnerniarneqarpoq. Maannamut qallunaat nalunaarutaat, inunnut pillaaasarnermik inatsit malillugu napparsimavimmi imaluunniit paaqqinniffimmi inissinneqartussatut eqqartuunneqartunut atuuttoq, atorneqartarsimavoq.

Malersuineq pillugu aalajangersakkap ilanngunneqarnissaanut atasumik, Qanilleqqusinnginneq, najugaqataasinnaannginneq aamma anisitsisarneq pillugit inatsisip Kalaallit Nunaanni atuutilersinneqarnissaa pillugu peqqussutip nutarterneqarnissaa naggataagut siunnersuutigineqarpoq.

Politidirektørip qanilleqqusinnginneq, najugaqataasinnaannginneq aamma anisitsineq pillugit aalajangiinerata nalunaarutigineqarsimasup naammagittaalliuutigineqarneranik tunniussinissamat naammagittaalliornissamat piffissaliussaq sapaatit akunnerinik sisamanik sivisussusillip eqqunneqarnissaa nutarnerinermut atatillugu ilaatigut aallarnerniarneqarpoq.

Suliat ingammik qanilleqqusinnginneq pillugu unioqqutitsinerit pillugit, sivisuallaamik suliarineqartarnerisa taamaalillutillu eqqugaasunut sulii annertunerusumik artukkiisarnerisa, akornuserneqarnissaat allannguutip siunertarivaa. Tamatuma saniatigut qanilleqqusinnginneq pillugu utaqqiisaagallartumik aalajangiinermik nalunaarutiginninnerup (erngerluni qanilleqqusinnginnermik taaneqartartup) periarfissanngortinnissaata eqqunneqarnissaa aallarnerniaqarneqarpoq, taassumalu politidirektørip qanilleqqusinnginnissaaq najugaqataasinnaannginnerluunniit pillugit aalajangiinissaata tungaanut, utaqqiisaagallartumik eqqunngitsuliorfigineqartoq aamma eqqunngitsuliorfigineqartoq inoqutigiinni inoqutigisaqarsimappat inoqutai illersussavaa. Erngerluni qanilleqqusinnginnermi inerteqqutit assingusunik suussuseqartut ilaatinneqarput aamma qanilleqqusinnginnertut, qanilleqqusinnginneq pillugu inatsimmi aalajangersakkat atuuttut malillugit nalunaarutigineqartut inatsisitigut sunniuteqarput. Erngerluni qanilleqqusinnginneq nalunaarutigineqarsimasooq pillugu politidirektørip aalajangiineranik naammagittaalliorneq aamma naammagittaalliornissamut piffissaliussami qulaani taaneqartumi ilaassammat maluginiarneqassaaq.

### **Missingiummut Naalakkersuisuinit oqaaseqaatit**

Inatsisinut atuutitsinerimut suliaasaqarfiup pitsanngorsaavigineqarnissaanik Naalakkersuisut kissaateqarnerat tunngavigalugu, taamaalilluni sunniuteqarluartuuniassammat ullutsinnullu naleqquttuulluni, aamma taamaalilluni innuttaasut kissaataannut inatsisitigullu naapertuulluartaqarneranik misigisimanerannut naapertuunniassammat, inatsisissatut siunnersuut manna saqqummiunneqarpoq.

Inatsiseqarnermut ministereqarfiup suliaasaqarfiani 2023-imut pingaarnersiuiinerni (malersuineq pillugu) aamma 2024-imut pingaarnersiuiinerni (unnerluussuteqarnissamut piffissaliussap unitsinneqarnera aamma anisinnaatitaanermut malittarisassat pillugit) Naalakkersuisut noqqaassuteqarnerat tunngavigalugu siunnersuut suliarineqarpoq.

Malersuinerup aamma kinaassutsimik atornerluinerup pinerluutinngortinneqarneri, tassaapput aalajangersakkat Kalaallit Nunaanni Eqqartuussiveqarneq pillugu Siunnersuisoqatigiit ulloq 29. september 2022 ataatsimiinnerannit innersuussutigineqartut.

Tamatuma peqatigisaanik qanigisariinni nakuusertarneq akiorniarlugu Naalakkersuisut 2023-2027-imut iliuusissanut pilersaarutaanni, pinerluttulerinermi inatsimmi malersuineq pillugu aalajangersakkamik ilanngussisoqarnissaa innersuussutit ilagaat. Malersuineq pillugu immikkut ittumik aalajangersagaqalernerata kingunerisaanik, tamatuma peqatigisaanik anisitsisarneq pillugu inatsimmi aamma allannguisoqartariaqarpoq, taamaalilluni allannguutit, malersuineq pillugu aalajangersakkap ilanngunneqarneranut atatillugu qallunaat inatsisaanni ilanngunneqartut, aamma Kalaallit Nunaannut atuutilerniassammata. Tamanna ilaatigut erngerluni qanilleqqusinnginneq pillugu malittarisassanut tunngassuteqarpoq.

### **Pisortanut aningaasaqarnikkut allaffissornikkullu sunniutissat**

Soqanngilaq.

### **Namminersorlutik inuussutissarsiutilinnut aningaasaqarnikkut allaffissornikkullu sunniutissat**

Soqanngilaq.

### **Innuttaasunut aningaasaqarnikkut allaffissornikkullu sunniutissat**

Soqanngilaq.

## **Naligiimmik pineqarneqarnermut sunniutissat**

Malersuinerup pinerluutinngortinneqarnera, soorlu tarnikkut nakuuserfigineqarnerup aamma digitaliusumik isumapiloqarneq tunngavigalugu tatiginnilersitsiniaanerup, grooming-ip, pinerluutinngortinneqarneri assigalugit, kiisalu akuersissuteqaqqaarnissamik tunngavilimmik pinngitsaalilluni atoqatiginninneq pillugu aalajangersakkap eqqunneqarnera, nakuusernerit ilungersunartut akiorniarneqarnerannut alloriarneruvoq pingaaruteqartoq.

Malersuinerup pinerluutinngortinneqarnera aammattaaq Arnanut nakuusertarneq angerlarsimaffinnilu nakuusertarneq pitsaaliorniarlugit akiorniarlugillu Europarådip isumaqatigiissutaani (Istanbulimi isumaqatigiissummi) Artikili 34-ip malinneqarnissaanut naammassinnippoq.

## **Tusarniaaneq**

Inatsiseqarnermut ministereqarfiup tusarniaaneq isumagisimavaa, tassanilu kalaallit oqartussaasui attuumassuteqartut ilaatinneqarsimapput. Siunnersuut piffissami 2024-imi 24. majimiit 21. juni ilanngullugu tusarniutigineqarsimavoq.

## **Ilanngussat**

1. Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allannngortinneqarnerat pillugit inatsisip (Malersuineq akiorniarlugu suliniutit patajaallisaavigineqarnerat, kinaassutsimik atonerluinerup pinerluutinngortinneqarnera aamma unnerluussuteqarnissamut piffissaliussap unitsinneqarnera il.il.) pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuutip eqikkarneqarnera aamma Qanilleqqusinnginneq, najugaqataasinnaannginneq aamma anisitsisarneq pillugit inatsisip allannngortinneqarnera pillugu inatsisit assigiinngitsut Kalaallit Nunaannut atuutilersinneqarnissaat pillugu peqqussutissamut missingiut
2. Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allannngortinneqarnerat pillugit inatsisip (Malersuineq akiorniarlugu suliniutit patajaallisaavigineqarnerat, kinaassutsimik atonerluinerup pinerluutinngortinneqarnera aamma unnerluussuteqarnissamut piffissaliussap unitsinneqarnera il.il.) pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut
3. Qanilleqqusinnginneq, najugaqataasinnaannginneq aamma anisitsisarneq pillugit inatsisip allannngortinneqarnera pillugu inatsisit assigiinngitsut Kalaallit Nunaannut atuutilersinneqarnissaat pillugu peqqussutissamut missingiut
4. Tusarniaanermut nalunaarsuutit oqaasertalersukkat